

禪林類聚卷第四

洋家藏書

雍熙禪寺住持嗣祖比丘道泰天寧禪寺首座比丘智境集

祖教

問法

朝田家藏書

祖教 祖意 教意

六祖大師因僧問黃梅意旨甚麼人得師云會佛法人得云和尚還得不師云我不得云和尚為甚麼不得師云我不會佛法

汾陽昭代云方知密旨難傳 翠巖芝云會得三頭不會得三省作麼生道得出身之路 白雲端云大眾還識祖師麼 徑山杲云大眾還見祖師麼若也不見徑山為你指出蕉芭蕉芭有葉無丫忽然一陣狂風起恰似東京大相國寺裏三十六院東廊下北角頭王和尚

破袈裟畢竟如何歸室喫茶

佛性泰云破布裏真珠

識者方知是寶爛泥藏棘刺踏著方乃驚人諸人還見
祖師麼倒騎白額虎空

以眾人前

佛印元鑿云當日黃梅傳意旨會佛法人如竹筍鱗龍
頭角盡成空盧老無能較此子

馬祖一禪師僧問離四句絕百非請師直指西來意師云
我今日勞倦不能爲汝說問取智藏去僧乃問藏藏云何
不問和尚云和尚教來問藏云我今日只與痛不能爲汝說
去問取海兄僧遂問海海云我到這市裏却不會僧舉似師
師云藏頭白海頭黑

馮山喆云這僧與麼問馬師與麼答離四句絕百非智
藏海兄都不知會麼不見道馬駒踏殺天下人 五祖

演云馬大師無著慚惶處只道得箇藏頭白海頭黑這
僧將一擔朦朧換得箇不會若也眼似流星多少人共
錢遭罪 佛眼遠云大衆說只道黑理甚分明諸人還
見馬大師麼又立也太無端 文殊道云馬師言中有
響這僧眼裏無筋西堂百丈同坑無異土依樣畫葫蘆
只如馬大師道藏頭白海頭黑又作麼生片雲橫谷口
迷却幾人源

雪竇顯頌云藏頭白海頭黑明眼衲僧會不得馬駒踏
殺天下人臨濟未是白拈賊離四句絕百非天上人間
唯我知 南華島云四句百非皆杜絕陽春白雪唱彌
高風清月皎無雲夜誰把吹毛換寶刀 照覺總云百
非四句絕何言黑白分明定正偏獅子窟中無異獸驪

龍行颶浪滔天 佛鑑勲云湘靈二女神僊格笑倚朱
門香陌陌一抹臙脂透臉紅更加十分天真色 圓覺
演云百非四句絕踈親馬駒踏殺天下人藏頭白兮海
頭黑門外金剛笑又嗔

馮山祐禪師因仰山問如何是祖師西來意師云大好燈
籠仰云莫只這箇便是麼師云這箇是甚麼仰云大好燈
籠師云果然不識

麻谷徹禪師因僧問十二分教某甲不疑如何是祖師西
來意師乃起立以杖繞身一轉翹一足云會麼僧無對師
乃打之

荷澤會禪師到思和尚處思問甚麼處來師云曹溪來思
云曹溪意旨如何師振身而立思云猶帶瓦礫在師云和

尚此間莫有真金與人不思云設有與汝向甚麼處尋

玄沙云果然 雲居錫云只如玄沙道果然莫真金是

瓦礫 翠巖芝云真金瓦礫錄下名言且道如今喚作

甚麼 天聖泰云神會若不見思師焉知瓦礫思和尚

被他一問直得額頭汗出口裏膠生

南嶽思禪師僧問如何是祖師西來意師云又恁麼去也

僧又問近日有何言句乞示一兩則師召云近前來僧近

前師云分明記取

大梅常禪師僧問如何是祖師西來意師云西來無意

鹽官聞云一箇棺材兩箇死漢 玄沙云鹽官是作家

雪竇顯云三箇也得 黃龍新云雪竇道三箇也得爲

復是死漢是活漢是不死不活漢具眼者試請甄別

水潦禪師問馬祖如何是西來的的意祖乃當肯一踏踏
倒師忽契悟起來拊掌大笑云也大奇也大奇百千三昧
無量妙義只向一毛頭上便一時識得根源去遂乃作禮
而退廣燈小異

琅琊覺云大衆你道水潦還曾悟也未天童覺云馬
大師不合放過待伊起來恁麼道但問祇這一毫從甚
麼處得來待伊擬議更與一踏西禪需云大小水潦
喫人拳踢了却道他悟悟甚麼屎及乎起來更不識羞
猶道我向一毫頭上識得根源且莫捏目生花任山後
告衆云自從一喫馬師踏直至今笑不休且道笑箇
甚麼塗毒策云諸方咸云瘥病不假驢駝藥風流不
在著衣多殊不知水潦錯喫巴豆吐得許多惡毒方盡

若是禪全未夢見具眼者試甄別看

照覺總頌云水潦承機徹祖意馬駒一踏曉根源虛空
撲落無閑地却向滄溟駕鐵船白雲端云一踏倒時
堪大笑從前伎倆盡徒勞蛇頭却要重揩痒萬萬千千
出一毫旻古佛云海上海上追奔天馬駒偶來騰踏露全
軀百千妙義毫端現拊掌呵呵笑識渠野軒導云馬
駒一踏驢兒倒地大笑起來羊鳴犬吠

龐蘊居士坐次問靈照云古人道明明百草頭明明祖師
意你作麼生照云老老大大作這箇語話士云你作麼生
照云明明百草頭明明祖師意士乃笑
乳源禪師示衆云西來的的意也不易舉唱時有僧出師
劈脊便打云如今是甚麼時節出頭來便歸方丈

保福展代云為和尚不惜身命 長慶稜云我即不然
 保福云作麼生慶云不妨不妨 承天宗云宗乘也不
 易扶豎這兩箇老漢扶不起我道這僧若不出頭捧即
 是乳源自喫 西禪需云這老漢雖是不惜身命入泥
 入水未免瞎却一切人眼去在
 虔州微禪師僧問三乘十二分教體理得妙與祖師意是
 同是別師云恁麼即須向六句外鑒不得隨他聲色轉云
 如何是六句師云語底默底不語底不默底總是總不是
 汝合作麼生僧罔措
 趙州諗禪師僧問如何是祖師西來意師云庭前栢樹子
 云和尚莫將境示人師云我不將境示人云如何是祖師
 西來意師云庭前栢樹子

慈明圓頌云趙州庭前栢天下定禪客養子莫教人大
 了作家賊 浮山遠云庭前栢樹趙州道廬陵米價吉
 陽敷三歲兒童皆念得八十翁翁會也無 雲峰悅云
 入門何必辨來機老倒禪和不自知栢樹庭前剛指示
 番令平地下針錐 雪竇顯云七百甲子老禪和安貼
 家邦若是他人問西來指庭栢却令天下動干戈 黃
 龍南云趙州有語庭前栢禪者相傳古到今摘葉尋枝
 雖有解須知獨樹不成林 天衣懷去趙州庭前栢三
 冬括地寒處處綠楊堪繫馬家家門首透長安 翠巖
 真云僧問西來意趙州栢樹酬皮下若有血官差不自
 由 湛堂準云庭前栢樹子少悟出常情雨過山添翠
 雲收日月明 堯率悅云趙州全不犯工夫觀面寧存

細與麤重疊示君君不見庭前栢樹本來無

趙州僧問如何是祖師西來意師云欄中失却牛齷作

慈雲圓照頌云欄中失却半有問即有詔更若求玄妙

糊糝築氣毬

趙州僧問如何是祖師西來意師云板齒生毛

投子青頌云九年少室自虛淹爭似當頭一句傳板齒

生毛猶可事石人踏破謝家船

嵩嶽安國師因坦然問如何是祖師西來意師云何不問

自己意云如何是自己意師云當觀密作用云如何是密

作用師以目開合示之然於言不知歸

泐潭會禪師問馬祖如何是西來祖師意祖云低聲近前

來師近前祖打一擗云六耳不同謀來日來師來日後入

法堂云請和尚道祖云且去待上堂時出來與汝證明師

乃悟云謝大衆證明乃遶法堂一匝便去

黃龍南云古人尚道六耳不同謀那堪今日三百五百

浩浩地商量禍事 圓悟勤云南禪師不妨因風吹火

未免也隨語生解若問道林如何是祖師西來意只向

他道泥多佛大水長船高

靈樹敏禪師僧問如何是祖師西來意師默然後遷化欲

立行狀碑要選此語刻石時雲門為首座僧問先師默然

處如何上碑雲門代云師

白雲端頌云師之一字大巍巍獨向寰中定是非必竟

水須朝海去到頭雲定覓山歸 佛印元云靈樹當初

密對揚暗中文彩已全彰後又不見雲門老一字千般

亂度量 旻古佛云師字相酬作者知韶陽千古特光
輝茫茫宇宙人無數到底誰明一字師 寶峰明云西
來祖意若為酬手把明珠已暗投却被雲門添一字致
令千古鬧啾啾

藥山儼禪師僧問祖師未來時還有祖意也無師云有云
既有祖師又來作麼師云只為有所以來

龍牙道禪師僧問如何是祖師西來意師云待石烏龜解
語即向汝道云石烏龜解語也師云向汝道甚麼僧無對
保寧勇代云和尚也須忌口始得

投子青頌云石龜語話是謔聞無耳鬪體夜聽深天曉
便藏無影樹太陽雖照不能尋

龍牙初參翠微師乃問云如何是祖師西來意翠微云與

我過禪板來師過與微微接得便打師云打則任打要且
無祖師意又參臨濟亦如是問濟云與我過蒲團來師過
與濟濟接得便打師云打即任打要且無祖師意師後任
山有僧問和尚當年問二尊宿祖師意明也未師云明則
明已要且無祖師意 廣燈先
參臨濟

五祖戒云祖師土宿臨頭又云和尚得與麼面長 雪

竇顯云臨濟翠微只解放不解放我當時若作龍牙待
伊索蒲團禪板拈得劈肯便擲 翠巖芝云當初如是
今時衲僧皮下還有血麼 大瀉喆云翠微臨濟可謂

本分宗師龍牙一等是撥草瞻風與他後人為龜為鑑
又舉任山後僧問處乃云龍牙瞻前顧後應病與藥大
瀉則不然待問當時二尊宿明不明劈脊便棒非唯扶

豎翠微臨濟乃不辜他來問 石門聰云龍牙無人挨
著猶可纔被箇衲子挨著失却一隻眼

雪竇顯頌云龍牙山裏龍無眼死水何曾振古風禪板
蒲團不能用只應分付與盧公盧公付了亦何憑坐倚
休將繼祖燈堪對暮雲歸未合透山無限碧層層 佛
性泰云子卿不下單于拜始末常導漢帝儀雪後乃知
松栢操事難方見丈夫兒 天童覺云蒲團禪板對龍
牙何事當機不作家未意成禰明目下恐將流落在天
涯虛空那掛劍星漢却浮槎不萌草解藏香象無底籃
能著活蛇今日江湖何障礙通方津渡有船車

龍牙問洞山如何是祖師西來意洞山云待洞水逆流即向
汝道師從此悟旨

汾陽昭頌云龍牙未息狂心地遍問諸師不肯休先達
愍他親志切直言洞水逆須流 投子青云古源無水
月何生蒲岸西流一派分葱嶺罷詢能算要雪庭休話
少林春

龍牙僧問如何是西來意師云此一問最苦

報慈云此一問最好

雪峰存禪師問僧近離甚處云為山師云為山有何言句
云某甲曾問如何是祖師西來意山據坐師云汝肯他不
云不肯他師云為山古佛子速去禮拜懺悔玄沙聞云山
頭老漢蹉過為山僧問未審和尚意旨如何沙云大小為
山被這一問直得百雜碎

東禪齊云甚麼處是蹉過的當蹉過莫便恁麼會也無

若恁麼會即未會為山意只在只如雪峰云為山古佛子
速去懺悔是證明為山是讚嘆為山此事也難子細好
見去也不難

雪峰因僧問西山和尚如何是祖師西來的的意山舉拂
子示之其僧不肯禮拜出去後參師師問甚處來云浙中
來師云今夏在甚麼處云蘇州西山師云和尚安不云來
時萬福師云何不且從容在彼云佛云不明師云有甚麼
事僧舉前話師云汝作麼生不肯他僧云是境師云汝見
蘇州人家男女不云見師云汝見路上林木不云見師云
凡覩人家男女大地林沼總是境汝還肯不云肯師云祇
如拈起拂子汝作麼生不肯僧云禮拜云學人取次發言
分師慈悲師云盡乾坤是箇眼汝向甚麼處蹲坐其僧無

語
雪峰一日與玄沙夾籬次沙問處何是祖師西來意師將
籬障撼沙云喫許多辛苦作甚麼師云子作麼生沙云且
過篋頭來

三聖然禪師僧問如何是祖師西來意師云臭肉來蠅僧
舉似興化化云我即不與麼僧云如何是祖師西來意化
云破驢脊上足蒼蠅

正覺逸頌云水母有骨靈龜無殼驢臭肉來於蠅佛
意祖意如山嶽 白雲端云破脊蠅多臭肉蠅誰知興
化不徒行慣從五鳳樓前過手搥金鏘賀太平 黃蘗
勝云匝地風光無間遠因何不信却生疑老婆為君重
指出臭肉團上青蠅飛

巖頭齋禪師示衆云吾嘗究涅槃經七八年於中有三兩段義頗似衲僧說話又云休休時有僧出作禮云請和尚爲衆舉師遂云吾教意如心字三點第一向東方下一點點開諸菩薩眼第二向西方下一點點諸菩薩命根第三向上方下一點點開諸菩薩頂門此是經中第一段義又云吾教意如摩醯首羅擘開面門豎亞一隻眼此是第二段義又云吾教意如塗毒鼓擊一聲遠近聞者俱喪此是第三段義時有小巖上座出問如何是塗毒鼓師以手按膝亞身云韓信臨朝底

投子大同禪師遇翠微於法堂上行便問西來意旨和尚如何示人微顧視之小頃師云金師垂示微云更要第二劫慈水那師便禮拜微云莫塚却時至根苗自生域作異

本覺一頌云曾把西來問翠微經行駐步大慈悲當時投子如能會惡水重將更潑誰

睦州蹤禪師僧問如何是教意師云我不答你云和尚爲甚不答師云爲你念來又問如何是西來意師云那箇師僧何不近前來僧便近前師云我喚浙東人干浙西人甚麼事又問如何是曹溪的的意師云路逢劍客須呈劍不

是詩人莫獻詩

睦州因座主問三乘十二分教某甲粗知未審宗門事乞師提綱師云問著宗門事有甚麼難道恰問著老僧鼻孔你頭上漫漫脚下漫漫教家喚作甚麼主云教家無這箇意旨師以拄杖趁出

睦州僧問祖意教意是阿是別師云青山自青山白雲自

白雲僧又問巴陵陵云鷄寒上樹鴨寒下水
雪竇顯云問既一般答亦相似其中有利他自利瞞人
自瞞若檢點分明管取解空第一 天童覺於白雲自
白雲處云若向這裏識得睦州釋迦出世達磨西來總
是不守本分底漢還識得麼臂長衫袖短脚瘦草鞋寬
大同濟禪師僧問如何是祖師西來意師云庭前一叢竹
經霜不自寒云畢竟如何師云只聞風擊響知是幾千竿
又問如何是佛法大意師云燕從秋後去鴈向孟冬來云
請師直指師云葉經霜後落花向雪中開
佛鑑勲云或有人問智海如何是祖師西來意但云綠
葉擎雲細心空節浪高畢竟如何但云不因漁父引爭
得見波濤如何是佛法大意云庭前一叢花千枝及萬

枝請師直指云春風一陣來滿地紅英落大衆作麼生
會且各自歸堂去

仰山湧禪師僧問曹溪意旨如何師云一鑊入寒空

投子青頌云重峰層仞插寒空塔鏤深雲勢莫窮千古
松聲求有韻萬年溪水去無蹤

石霜諸禪師僧問如何是祖師西來意師乃扣齒示之僧
不會師遷化後其僧問九峰云先師扣齒意旨如何峰云
我寧可截舌不犯國諱僧又問雲蓋蓋云我與先師有甚
冤讎

石霜云一代時教是整頓你時人手脚九有其由皆落今
時直至法身非身猶是教家極則我輩沙門全無肯路若
分即差不分即坐著泥水

石霜僧問教中還有祖師意麼師云有云如何是教中祖師意師云莫向卷中求

雲門代云不得辜負老僧却向屎坑裏坐地作甚麼石霜僧問如何是祖師西來意師云空中一片石僧禮拜師云會麼云不會師云賴汝不會若會即打破你頭三平忠禪師因講僧問三乘十二分教某甲不疑如何是祖師西來意師云龜毛拂子兔角拄杖大德藏向甚麼處云龜毛兔角豈是有耶師云肉重千斤智無銖兩荷玉慧禪師僧問如何是西來的的意師云不禮拜更待何時

丹霞淳頌云虛堂寂寂夜深寒攜得瑤琴月下彈不是知音徒側耳悲風流水豈相干

夾山會禪師因西川座主遊方至白馬舉華嚴經問一塵含法界無邊時如何白馬云如碾二輪如鳥兩翼主云將謂禪門別有奇特元來不出教乘乃回本地後聞師盛化遣小師持前語問師師云雕沙無鏤玉之談結草垂道人

之思小師回舉似座主主乃讚歎云將謂禪門與教意不殊元來有奇特事

峇山緣禪師僧問如何是祖師西來意師云半夜烏兒頭戴雪天明啞子抱頭歸

丹霞淳頌云瑞霧祥煙鏤玉樓妙年王子恣優遊琉璃殿上騎金馬明月堂前鞦韆毬

甘贄行者問僧甚麼處來云瀉山來者云曾有僧問瀉山如何是西來意瀉山舉起拂子上座作麼生會瀉山意云

即色明心附物顯理者云且歸為山去好

保福展聞之乃仰手覆手

香巖閑禪師因為山僧來師問曾有僧問為山如何是西來意為山舉起拂子上座作麼生會為山意云即色明心附物顯理師云會即便會著甚死急僧却問師意如何師還舉起拂子

玄沙云只如香巖脚跟猶未點地

雲居錫云甚麼處

是香巖脚跟未點地處

性空云我當時若見香巖豎

起拂子亦向伊道著甚死急

香巖僧問如何是西來意師以手入懷出拳展開與之僧乃跪膝以兩手作受勢師云是甚麼僧無對

雲門偃禪師僧問如何是祖師西來意師云日裏看山

智門祚頌云日裏看山也是常西來祖意謾商量金色

獅子希逢有多是狐狸喚作狼

無為子云日裏看山

滿眼青千巖萬壑闢縱橫洞門疑是雲遮斷到者須知

路坦平

三祖宗云匡真不惜兩莖眉日裏看山對祖

機膈月火燒春又綠只宜飛走會相依 佛鑑勸云雨

餘江上兩三峰堆疊煙嵐不記重眼裏看來端的瞎耳

根聞處出天聰

投子青云坦然曾問老師安爭似韶

陽一句傳日裏華山偃掌露夜深猿叫月當軒

雲門僧問如何是一代時教師云對一說

雪竇顯頌云對一說太孤絕無孔鐵鎚重下楔闍浮樹

下笑呵呵昨夜驪龍拗角折剔剔韶陽老人得一椽

五祖演云對一說卷盡五千四十八風花雪月任流傳

金剛腦後添生鐵 佛性泰云對一說五教三乘盡該
攝龍宮海藏任縱橫水底泥牛吞却月

雲門云三乘十二分教達磨西來放過即不可若不放過
不消一喝

雪竇顯舉了隨後一喝復云大衆好喝落在甚處若要
鼻孔遼天辨取這一喝

雲門僧問如何是教意師云你看甚麼經云般若經師云
一切智智清淨還夢見未云一切智智清淨且置如何是
教意師云心不負人面無慚色放你三十棒

雲門僧問如何是曹溪的的意師云老僧愛嗔愛喜云爲
甚麼如此師云路逢劍客須呈劍不是詩人不獻詩

雲門云是你諸人繞天下行脚不知有祖師意露柱却知

有祖師意你作麼生明得露柱知有祖師意自代云九九
八十一

雲門行脚時到江西陳操尚書請契飯陳乃問三乘教典
即不問儒書更不在言作麼生是行脚事師云曾問幾人
來云即今問上座師云即今且置作麼生是教意云黃卷
赤軸師云這箇是語言文字作麼生是教意云口欲談而
詞喪心欲緣而慮忘師云口欲談而詞喪爲對有言心欲
緣而慮忘爲對妄想作麼生是教意陳無對師云見說尚
書看法華經是不云是師云經中道治世語言貧生產業
皆與實相不相違背且道非非想天有幾人退位陳又無
對師云尚書且莫草草十經五論師僧拋却入叢林十年
二十年尚不柰何尚書又爭會得陳作禮云某甲罪過

雲居膺禪師問洞山如何是祖師西來意山云闍黎他後有把茅蓋頭有人問你作麼生云道膺罪過

清平遵禪師問翠微如何是祖師西來意微云待無人處為汝說師良久云無人也請和尚說微引師入竹園師又云無人也請和尚說微指竹云這一竿得與麼長那一竿得與麼短師遂領旨後住清平謂眾云先師入泥入水相為自是我不識好惡

洛浦安禪師僧問如何是祖師西來意師云青嵐覆處出岫藏峰白月輝時碧潭無影

丹霞淳頌云羣花未發梅先折萬木凋零栢轉奇雲淡不彰節月影煙輕那露引風枝

洛浦僧問如何是祖師西來意師以拂子擊繩床云會麼

云不會師云天上忽雷驚宇宙井底蝦蟆不舉頭

洛浦僧問祖意教意是同是別師云日月並輪輝誰言別有路云恁麼則顯晦殊途事非一揆師云但自不亡羊何須泣岐路

丹霞淳頌云月篩松影高低樹日照池心上下天赫赫炎空非卓午團團秋夜不知圓

白水仁禪師因長生皎然問如何是西來意師云還見庭前杉檟不然云恁麼即和尚今日因學人致得是非師云多口座主然去後師知是雪峰禪客乃云盜法之人終不成器

然後住長生山有僧問從上宗乘如何舉唱然云不可為闍黎一人荒却長生山也玄沙聞之云然師兄佛法

即大行受記之緣亦就矣厥後眾緣不備果如所記

梁山觀禪師僧問如何是祖師西來意師云莫亂道

投子青頌云國令嚴嚴擬者危毫釐纔動鐵輪隨心萌

口應三千里齒露言來苦怨誰

梁山僧問祖意教意是同是別師云金烏東上人皆貴王

兔西沉佛祖迷

丹霞淳頌云靈山會上言雖普少室峰前句未形瑞草

蒙茸含月秀寒松蒼鬱出雲青

梁山僧問如何是從上來傳底事師云渡水胡僧無膝袴

背馳梵夾不持經問如何是祖師西來意師云忽嶺不傳

東土信胡人謾說太平歌

保福履禪師因長生卓庵去相訪茶次生云有僧問某甲

如何是祖師西來意某甲豎起拂子不知得不得師云我

爭敢道得不得有箇問有人讚嘆此事如虎帶角有人輕

賤此事分文不直一等是與麼事為甚讚毀不同請試揀

出看生云適來出自偶爾爭揀得出師云若恁麼此後不

得為人傳燈作長生訪庵主

乎上座云若無智眼難辨得失 有一老宿云毀又爭

得一老宿云惜取眉毛 雪竇顯都別云若非和尚

證明拂子一生無用 玄覺云一等是與麼事為甚麼

有得有不得

巴陵鑿禪師僧問祖意教意是同是別師云鷄寒上樹鴨

寒下水

五祖演云大小巴陵只道得一半白雲即不然掬水月

在手弄花香滿衣 松源岳云白雲盡力道只道得八
成有問靈隱只向他道人我無明一串穿

保寧勇頌云昨夜三更屈指輪世間休說兩三人數聲
羌笛離亭晚君向瀟湘我向秦 投子青云同別祖教

問端由便將元價與他酬絲綸夜靜人垂釣曉得金烏
帶月收 湛堂准云鷄寒上樹鴨寒下水時節不相饒

古今自然理寒松十里吼清風流水一溪聲未已

木平道禪師僧問如何是祖師西來意師云石羊頭子向
東看

汾陽昭頌云木平高道最難過人問西來意若何石羊

頭子向東望月明纔上徧山坡直言不用多疑慮海澄

浪息現森羅 照覺總云木平本自無斤斧好肉那堪

著般般直指西來親切意石羊頭子向東看 佛印元

頌云老胡萬里向支那直至而今不奈何堪笑牧童誰問

問路一聲長笛過前坡 雲谷師云我前師云西來意

香林遠禪師僧問如何是祖師西來意師云坐久成勞

雪竇顯頌云一箇兩箇千萬箇脫却籠頭卸角馱左轉

右轉隨後來紫湖要打劉鋹磨 野軒遵云香林無雜

木一一 是旃檀野火忽然發清風天地寬祖意報爾曹

坐久自成勞 雲谷師云我前師云西來意

黃龍機禪師嘗問巖頭如何是祖師西來意頭云汝還解

救餐麼師云解頭云且救餐去師後到玄泉又問如何是

祖師西來意泉拈起一莖皂角云會麼師云不會泉放下
作洗衣勢師便禮拜云將知佛法無別泉云汝見甚麼道

理師云某甲曾問巖頭師翁頭云汝還解救餐麼救餐也
只是解黏和尚提起皂角亦是解黏所以道無別泉呵呵
大笑師因此忽然信入

九峰蒲禪師僧問如何是祖師面來意師云更問阿誰云
恁麼則學人全體是也師云須彌頂上戴須彌

圓悟勤云盡也盡不成捏也捏不就且道是箇甚麼須
彌頂上戴須彌

光孝鐵嘴覺禪師至法眼處眼問近離甚處師云趙州眼
云承聞趙州有栢樹子話是不師云無眼云徃徃皆謂僧
問如何是祖師西來意趙州云庭前栢樹子上座何得道
無師云先師實無此語和尚莫謗先師好眼云真獅子兒
白雲端頌云新羅鷓子刺天飛鈍鳥籬邊悞不去趙州

庭前一何高誰道先師無此語 瀉山秀云僧問西來

栢樹酬何必斯言謗趙州令人長憶清涼老一句當年
喚轉頭 正覺逸云日炙風吹瘦影孤趙州嘗指庭前

株昇元大小清涼老未會先師此語無 大洪遂云趙
州無語幾人知江北江南見者稀山寺桃花復何在相

逢空愛白公詩 佛印元云庭前栢樹子趙州無此語
承言須會宗勿自立規矩 真淨文云庭前栢樹子趙

州無此語若是本色人直下未相許
石門徹禪師僧問如何是三乘教外別傳一句師云東村

王老夜燒錢

洞山聰頌云東村王老夜燒錢草鞋踏地帽指天家無
白澤招禍福窮時相炒餓相煎 地藏恩云東村王老

夜燒錢眼中塵霧口中煙招神引鬼成妖怪三脚蝦蟆
飛上天 上方益云東村王老夜燒錢野鬼閉神滿目
前休更逢人覓玄旨謝家人不在漁船 無爲子云三
乘教外別流傳瞎漢多知喚作禪天下衲僧參不到東
村王老夜燒錢

首山念禪師僧問如何是祖師西來意師云風吹日炙
汾陽昭頌云日炙風吹不計年行人塵路辨應難擬心
早已深三尺更教誰問箇中文 法華舉云風吹日炙
少人知頂仰先賢對此機饒君曠劫生前會穿耳胡僧
也皺眉 翠巖真云日炙風吹問祖來紅塵且野眼難
擡忙忙役役知多少二月春深動地雷 三祖宗云日
炙風吹也大奇根鏘疋馬將家兒皇圖自古元無事撥

動煙塵更是誰 雲溪恭云日炙風吹當路頭衲僧見
後莫遲留我今到此堪惆悵葉落花紅經幾秋
汾陽昭禪師僧問如何是祖師西來意師云青綃扇子足
風涼

白雲端頌云青綃扇子足風涼親得搖來始息狂只愛
團團無縫者人前空自眼如羊 正覺逸云叢林傑出
鎮汾陽譽走名馳振八方人問西來祖師意解云扇子
足風涼 上方益云汾陽青扇價難酬爲有涼風卒未
休不見鹽官多少衆競頭爭角覓犀牛 慈受深云青
綃扇子足風涼日用何曾有覆藏堪笑塵中無限客手
遮西日汗如湯 楚安方云親得搖來始息狂風動荷
花滿座香自從一得真歸趣無意涼人人自涼

浮山遠禪師僧問如何是祖師西來意師云平地起骨堆
 海印信頌云平地起骨堆三春震地雷只聞千萬去不
 見一人回 地藏恩云平地起骨堆金毛獅子吼誰知
 無味談塞斷衆人口 投子青云嫩草疏斜徑山泉帶
 碧流文曾要涓水烈士耻莊周 天寧璉云大朴未分
 時混然成一片明暗不曾彰已過新羅箭

大寧寬禪師僧問教中道始知衆生本來成佛為甚麼却
 有煩惱菩提師云甘草甜黃連苦云却成兩箇去也師云
 你不妨會得好

南臺勤禪師僧問如何是祖師西來意師云一寸龜毛重
 七斤

投子青頌云等閑不語未逢人語便傷直似太親不顧

次中鸞鳳息驚他石虎暗生瞋

鐘山章禪師僧問如何是祖師西來意師云不東不西

保寧勇頌云西來祖意不東西猿鳥春深抱樹啼多少

行人空悵望青山孤聳白雲低

長平山禪師僧問如何是祖師意師云西天來唐土去

演教大師僧問如何是祖師意師云今日明日

風穴沼禪師僧問西祖傳來請師端的師云一犬吠虛千

猿嗥實又僧問如何是西來意師云尋山水盡山無盡又

僧問如何是西來意師云骨肉縱分離究竟難解洗

道場訥禪師僧問如何是教意師云汝自看僧禮拜師云

明月鋪霄漢山川勢自分

谷山藏禪師僧問祖意教意是一是二師云青天白日夜

半濃霜
崇恩禪師僧問祖意教意是一是二師云少林雖有月葱嶺不穿雲

黃山輪禪師僧問如何是祖師意師云梁殿不施功魏邦絕心迹

香城禪師僧問牛頭還得四祖意不師云沙書不點落千字云下點後如何師云別將一撮俵入天云恁麼即人人有也師云汝又作麼生

福清魏禪師僧問如何是西來的的意師云立雪未為勞斷臂方為的云恁麼即一花開五葉芬芳直至今師云因圓三界外果滿十方知

保明誠禪師僧問如何是和尚西來意師云我不曾到西

天不知如何是學人西來意師云汝在東土多少時

灌溪閑禪師僧問如何是祖師西來旨師云鉢裏盛飯鉢裏盛羹云學人不會師云饑即喫飽即休又問如何是祖

師西來意師云兩手扶牀脚云未審此理如何師云寒天

懶舉頭

洞山聰禪師僧問達磨未傳心地印釋迦未解髻中珠此時若問西來意還有西來意也無師云六月雨霖霖寬其萬姓心云恁麼則雲散家家月春來處處花師云脚跟下到金剛水際是少僧無語

興陽剎禪師僧問達磨未傳心地印釋迦未解髻中珠此時若問西來意還有西來意也無師云異草三反秀不待五天雷云若不上來伸此問焉能辨得法王機師云塞北

高飛鴈隨雲變身軀

白鹿端禪師僧問如何是教意師云楞伽會上云如何是祖意師云能當山前云祖意教意相去幾何師云寒松連翠竹秋水對紅蓮

瑞巖鴻禪師僧問如何是祖師初來意師云拂衣瞻漢月飛錫遠中天云意旨如何師云熊耳崔嵬千古色少林蒼翠幾流芳僧云謝師答語師云獅子咬人韓獪逐塊隨後便打

三祖宗禪師僧問祖意西來願垂開示師云泥牛吞巨浪云中下之機如何體究師云木馬踐紅塵云恁麼則法輪再轉祖道重光師云土上加泥

隱靜儼禪師僧問摩騰入漢藏教分明達磨西來有何意旨師云我法妙難思龍天盡歸向云未審祖意教意是同是別師云兩彩一賽云一言歸有道萬像自無心師云猶較此子

玉池儼禪師僧問如何是祖師的的意師云泥牛不喫欄邊草云和尚向何處安身立命師云直上孤峰頂上眠顯明昌禪師僧問如何是祖師西來意師云入離鄉賤物離鄉貴云莫便是西來意也無師云天台南嶽云將謂少林消息斷誰知今日宛然存師云道聽途說

大瀉春禪師僧問如何是祖師西來意師云何不問此中意云如何是此中意師云處處抱孫和淚語晚身猶值太平年云太平一句請師道師云風不鳴條雨不破塊云畢竟事作麼生師云南畝耕人不識名云豈無姓字師云盪

菜如泥云此是行市數師云你也少喫
淨居威禪師僧問如何是祖師西來意師云一宿二宿程
千山萬山身云意旨如何師云朝着東南暮看西北云向
上更有事也無師云人心難滿溪壑易填
天衣通禪師僧問如何是祖師西來意師云青松倒影垂
幽徑云學人不會師云綠竹寒聲夾亂流云學人從此更
無疑也師云且緩緩

慧林本禪師僧問如何是祖師西來意師云韓信臨朝云
中下之流如何領會師云伏屍萬里云早知今日事悔不
忌當初師云三皇塚上草離離

本覺一禪師僧問如何是祖師西來意師云擔水河頭賣
云意旨如何師云欺胡謾漢云勞而無功師云九年久不

識其後自空回

南釋寧禪師僧問如何是頓教師云月落寒潭云如何是
漸教師云雲生碧漢云不漸不頓時如何師云八十老婆
不言嫁

湛堂準禪師僧問教意即且置未審如何是祖意師云煙
村三月裏別是一家春

洞山言禪師僧問如何是祖師西來意師云真鍮不博金
云莫便是和尚為人處也無師云幾處松聲似雨聲云爭
柰一言已出師云猶欠註脚在

雲峰璿禪師僧問如何是祖師西來意師云築著額頭磕
著鼻云意旨如何師云驢馱馬載云向上還有事也無師
云朝到西天暮歸唐土僧云謝和尚答話師云大乘研郎

當

竹庵珪禪師僧問如何是祖師西來意師云東家點燈西家暗坐云未審意旨如何師云馬便搭鞍驢便推磨僧禮拜師云靈利衲僧只消一箇

道場辯禪師僧問如何是祖師西來意師云毒蛇無角最威猛云便恁麼會時如何師云梁山務長云只如教意又作麼生師云長江滾不休

天童清禪師僧問如何是祖師西來意師云眼裏不著沙云如何領會師云耳裏不著水云恁麼則禮拜也師云東家點燈西家暗坐

桃園朗禪師僧問如何是祖師西來意師云西來若有意斬下老僧頭云為甚却如此師云不見道為法喪軀

僧問如何是西來意

石頭遷禪師云問取露柱云學人不會師云我更不會

馬祖一禪師云即今是甚麼意又僧問師便打乃云我若不打汝諸方笑我也 鶴林素禪師云會即不會疑即不疑又云不會不疑底不疑不會底 靈瑞禪師云十

萬八千里 靈雲勤禪師云井底種林檎云學人不會師云今年桃李貴一顆直千金 紹宗禪師云好事不出門惡事行千里 報慈嶼禪師云昨夜三更送過江

天柱慧禪師云白猿抱子來青嶂蜂蝶啣花綠藥間

白水禪師云四溟無窟宅一滴潤乾坤 白馬儒禪師

云點額胡孫探月波 僊宗瑄禪師云熊耳不曾藏又云白日無閑人 南臺禪師云靴頭線綻 布水巖

禪師云一回思著一傷心 龍光禪師云胡風一扇漢

地成機 瑞峰端禪師云木馬走似煙石人越不及

石門遠禪師云布袋盛烏龜 靈竹珍禪師云錫帶胡

中土瓶添漢地泉 葉縣省禪師云齋後一椀茶

○僧問如何是祖師西來意

徑山欽禪師云汝問不當云如何得當師云待吾滅後即

向汝道 趙州諗禪師云東壁上掛葫蘆多少時也又

僧問師乃敲床脚僧云只這莫便是也無師云是即脫取

去 欽山邃禪師云梁公曲尺誌公剪刀 魏府大

覺禪師云十字街頭望空啓告 保壽沼禪師云面黑

眼睛白 北院通禪師云壁上掛枯松蜂來爭採藥

葉縣省禪師云冬無積雪夏有餘糧 伏龍禪師云竺

國不傳無字印支那謾說過流沙 石門蘊禪師云好

大哥玉印不離天子手金箱豈可庶人知 護國澄禪

師云一人傳虛萬人傳實 長水仁禪師云仰面獨揚

眉回頭自拍手 首山志禪師云三尺杖子破瓦盤

德山晏禪師云桃源水繞白雲亭 羅漢仁禪師云喚

甚麼作祖師西來意云恁麼則無西來意也師云由你口

頭道 歸宗暹禪師云洛陽城古云學人不會師云少

室山高 承天宗禪師云白雲抱幽石云乞師再垂方

便師云千里未是遠 永福朗禪師云瀟湘岸上雪蹄

蹤 涿水禪師云還見庭前花藥欄麻僧無對 大

安幹禪師云羊頭車子推明月 中梁古禪師云道士

擔漏卮 保安連禪師云死虎足上看 草庵義禪

師云爛炒浮漚飽蒲喫。龍穴山禪師云騎虎唱巴歌。

石門徹禪師云少林澄九鼎動浪百華新。廣德延

禪師云魚躍無源水鶯啼萬古松。青峯兔禪師云

池無一滴四海自滔涌。報恩明禪師云十萬八千真

跋涉直下西來不到東。九峰詮禪師云有力者負之

而趨。大陽玄禪師云解問不當云學人不會時如何

師云陝府鐵牛人皆嚮卞和得玉至今傳。定州崔禪

師云定州磁器似鐘鳴云學人不會意旨如何師云口口

分明勿啗斜。鎮州萬壽禪師云枯河覓魚蹤斬新過

來處。山房賓禪師云庭前看綠竹云畢竟如何兩林

松栢青。汾陽昭禪師云多年松樹饒皴皴心間自有

一條明又答云徹骨徹髓云此意如何師云徧天徧地

石門聰禪師云九里山上望船舟云意旨如何師云市船

亭前人不識。廣慧璉禪師云竹竿頭上帶紅旗。大愚芝禪

黃蘗謚禪師云紅輪光萬戶渌水繞青山。慈明圓禪師云畝地

師云白日燒地眠夜間交地卧。普照禪師云猴猴摘

三蛇九鼠又云三日風五日雨。山果野鹿下田中又云朝見八關開石室暮看金烏送枕

頭。佛陀遠禪師云眼中不著塵。月華禪師云梁

王不識云未審如何師云隻履西歸。德山柔禪師云

穿雲渡水涉歷江山。乾明普禪師云鳥道迷來迹

黑水環禪師云廓然坦蕩周沙界濁霧潛融佛日輝云如

何作用師云大地藏不得今日出身來。天睦滿禪師

云三年逢一閏云合談何事師云九月是重陽。鄧林

志禪師云庭前花發映天紅 崇勝祚禪師云眼不見

鼻云便恁麼領會時如何師云鼻孔裏呻羹 高陽廣

禪師云九年面壁人難別一句澄流事莫窺 石霜誠

禪師云青山無異色鳥道有玄關 德山先禪師云門

外千竿竹佛前一炷香 上泉古禪師云梁王殿上不

來徃魏國終歸隻履西 梁山巖禪師云新羅附子蜀

地當歸 青峰誠禪師云石牛欄古路木馬驟高樓

谷隱崇禪師云番人皮裘胡人著云不會此理如何師云

聾人側耳啞人歌 法華珍禪師云風吹蜘蛛連宵響

月照湖湘萬里途 景德言法華云青山影競潑嵐起

寶塔高吟撼曉風 雲蓋鵬禪師云湯餅火裏煨

雲蓋顯禪師云古寺碑難讀云未審意旨如何師云讀者

盡攢眉 上方岳禪師云少林空夜月云未審意旨如

何師云誰聽老猿啼 寶應昭禪師云少林巖畔千峰

秀云如何委悉師云汝海東流耀古今 大乘果禪師

云天晴日出云意旨如何師云雨下雲生 杖錫已禪

師云一船船過海赤脚回鄉 雙林已禪師云青松相對

赴悲風 谷隱踪禪師云日出東方光臨西戶 妙

智雲禪師云東籬黃菊云意旨如何師云九月重陽

天衣懷禪師云泛杯千頃浪登嶺萬重山 梅心宗禪

師云行人念路云學人不會師云緊峭草鞋 朝明則

禪師云清風生碧落云意旨如何師云明日映長江

翠巖真禪師云深耕淺種 楊岐會禪師云人心隔肚

鉢口向天 道吾真禪師云夜行人更多云未審意旨

如何師云天曉路旁邊 密印乾禪師云水從山上出

云意旨如何師云溪澗豈能留 廣法源禪師云觀頭

瓦片云 淨因臻禪師云拄杖橫擔不到肩云謝師答話

師云錯認定盤星 興化岳禪師云河裏木頭船

西禪圖禪師云枯木巖前云意旨如何師云抽條石笋

觀音啓禪師云松長栢短云意旨如何師云葉落歸根

龍符狂禪師云入市烏龜云意旨如何師云得縮頭時且

縮頭 黃蘗勝禪師云高臺無古鏡裏裏有真珠

報本元禪師云天輪左轉地軸右旋 四祖演禪師云

饑噴飽喜 玄沙文禪師云五里三歇云意旨如何師

云飲雪吞霜 雲居祐禪師云胡天雪壓玉麒麟

高臺明禪師云杖林山水多愛輓底流云學人不會師

云九月是重陽 保寧勇禪師云雪上加霜 石門

雅禪師云熊耳塔開空寂寂唯留隻履冒輕埃 承天

是禪師云石廩峰高云意旨如何師云遊人罕到 金

山寧禪師云秤尾無星云未審此意如何師云斗方有底

南明通禪師云登山千里月渡水一帆風云未審意旨

如何師云言前有路句下無私 定慧式禪師云萬水

千山云便恁麼去時如何師云千山萬水云專為流通師

云南北行人口似碑 寶華顯禪師云霜風落林葉云

霜風落林葉意旨如何師云逢春又却生 廣福章禪

師云春來花自發云學人未曉師云秋至葉先凋 褒

禪溥禪師云牡丹須是三春拆云學人未曉師云黃菊還

他九日開云恁麼則便是和尚為人處也師云錯 開

元祐禪師云扁舟衝雪浪云未審意旨如何師云一笠渡金陵

開先瑛禪師云君山點破洞庭心云意旨如何師云白浪四邊繞紅塵何處來

雲蓋本禪師云琉璃餅子僧擬議師便唱又僧問師云一隊衲僧來一隊衲僧去

保福殊禪師云一徑杉松滿面風云如何曉了師云白揚青草兩蒙茸

景福餘禪師云九年面壁無人會隻履西歸天下聞云學人未曉師云要會普通年遠事

下從葱嶺帶將來月頂倫禪師云涼風却退簷前暑

狼山惠禪師云海雲生嶽頂云學人不會師云楊子水

朝東雲門信禪師云千年古墓蛇今日頭生角云莫

便是和尚家風也無師云卜度則喪身失命越峰珪

禪師云瘦田損種云未審如何領解師云刈禾鎌子曲如

鈎仰山和禪師云君子不發遊言翠巖元禪師

云見錢賣買不曾賒云向上更有事也無師云好不信人

直慈雲謚禪師云紅輪輝萬戶綠水遶青山廣

因要禪師云長安東洛陽西景德政禪師云木耳樹

頭生將山泉禪師云髮長僧貌醜云未審意旨如何

師云閉戶怕天寒泐潭祥禪師云十箇指頭八箇丫

吉祥宜禪師云久旱無甘雨田中稻穗枯云意旨如何

師云今年米價貴容易莫嫌麤佛鑑勳禪師云喫醋

知酸喫鹽知鹹五祖自禪師云荆棘林中舞柘枝

雲頂禪師云孤舟載明月云意旨如何師云來徃照關浮

僧問祖意教意是同是別趙州諗禪師作拳安頭上僧云和尚猶有這箇在師卸下

帽子云你道老僧有箇甚麼 雪峰存禪師云雷聲震地室內不聞 夾山會禪師云風吹荷葉滿池青十里行人較一程 國清奉禪師云雨滋三草秀春風不裏頭云畢竟是一是二師云祥雲競起巖洞不麤 鷲嶺山本禪師云鷲嶺峰上青草森天鹿野苑中狐兔交橫百丈超禪師云金鷄玉兔聽統須彌 南院顯禪師云黃尚書李僕射云不會師云牛頭南馬頭北 法華舉禪師云赤水求珠孫贖打瓦 同安威禪師云玉兔不曾知曉意金烏那肯夜頭明 傳法禪師云華開金線秀古洞白雲深 善權徹禪師云冬寒夏熱云冬寒夏熱此理如何師云炎天宜散袒冬後更深藏 鷲峰韶禪師云日出東方夜落西 西禪光禪師云拾得寒山

子相招上石橋 建福同禪師云崇山峻嶺云恁麼即不同師云夢澤波清 林溪徹禪師云二由一有一亦莫守 南明慎禪師云水天影交碧云畢竟是同是別師云松竹聲相寒 廣法源禪師云乾薑附子云與麼則不同也師云冰片雪團 興陽珊禪師云百尺竿頭開口笑云風高月冷乾坤淨直下無絲暢殺人師云詞謠滿路僧禮拜師便打 五祖演禪師云人貧智短馬瘦毛長 福昌善禪師云巢知風穴知雨 承天宗禪師云胡馬嘶北風越鳥巢南枝 雲頂鵬禪師云達磨逢梁武摩騰遇漢明 香巖敷禪師云鳳闕摩空汴河瀉碧 南臺恭禪師云阿難合掌迦葉擎拳 越峰珪禪師云驢著槽馬著轅云爭奈學人未會何師云蘆花

罕地白絲鞭

李渤問歸宗西來意覲臨濟問趙州西來意見服

華嚴問蜆子西來意化僧問庵主西來意居

廬村僧問祖意見禪月問楊岐相意珠

香巖上樹西來意覲性空僧問西來意覲

雲居因法燈舉問祖意覲

問法

世尊因有異學問諸法是常耶世尊不對又問諸法是無常耶世尊亦不對異學云世尊具一切智何不對我世尊云汝之所問皆為戲論

舍利弗問須菩提夢中說六波羅蜜與覺時是同是別須菩提云此義幽深吾不能說此會中有彌勒大士汝往彼

問舍利弗遂回首問彌勒彌勒云誰名彌勒誰是彌勒者雪竇顯云當時若不放過隨後與一劄誰名彌勒誰是

彌勒者便見冰消瓦解雲峰悅於是同是別處遂唱云當時若下這一喝便見落三落四又於汝往彼問處

云果然復於未後云甚麼處去也

天親菩薩從彌勒內宮下無著菩薩問經云人間四百年

彼天爲一晝夜彌勒於一時中成就五百億天子證無生
法恐未審說甚麼法天親云祇說這箇法祇是梵音清雅
令人樂聞

天衣懷云彌勒已是錯說天親已是錯傳山僧今日將
錯就錯與你諸人註破良久云諦聽諦聽向下文長付
在來曰
利益菩薩白然燈佛我欲得阿耨菩提唯願世尊教示我
令速成菩提佛言利益汝觀此法何者是法是汝所問
南陽忠國師問僧近離甚麼處云南方師云南方知識以
何法示人云南方知識祇道一朝風火散後如蛇退皮如
龍換骨本爾真性宛然無壞師云苦哉苦哉南方知識說
法半生半滅云南方知識即如是未審和尚此間說何法

師云我此間身心一如身外無餘云和尚何得將泡幻之
身同於法體師云你爲甚麼入於邪道云甚麼處是某甲
入於邪道處師云不見教中道若以色見我以音聲求我
是人行邪道不能見如來

雲門舉云身心一如身外無餘山河大地何處有耶
袖鼻誣云若據這僧與麼道傳語也未解莫累及南方
知識據國師與麼道亦是龍頭蛇尾前來身心一如向
甚麼處去也試檢點看

南陽僧問如何是佛法大意師云文殊堂裏萬菩薩僧云
不會師云大悲千手眼

佛鑑勲云時年蔬菜賤滿地蘿蔔頭一文買一箇得者
飽齣齣

南陽問僧甚麼處來云江西馬大師處來師云大師說何法云常說即心是佛或云非心非佛師便唱出復召云更說何法云不是心不是佛不是物師云却較此子

黃龍新云大小國師語默裏轉却當時若見道不是心不是佛不是物更與唱出豈不光前絕後 松源岳云諸大老也甚奇恠打鑼敲枷平高就下說也說得到行也行得到只是未有出身之路喝一喝

清原思禪師僧問如何是佛法大意師云廬陵米作麼價汾陽昭頌云出家學道未心開請問宗師大意來却問廬陵米幾價當時心境一齊灰 黃龍南云廬陵米價逐年新道聽虛傳未必真大意不須歧路問高低且見本來人 法昌遇云烏龜三眼赤祥麟一角尖騰雲生

暮雨溪月夜明簾 高庵悟云老清原沒縫罅問佛法酬米價衲僧一粒若沾唇拄杖橫擔繞天下 天童覺云太平治業無象野老家風至淳只管村歌社舞那知舜德堯仁

黃蘗運禪師嘗問百丈從上古人以何法示於人百丈據坐師云後代兒孫將何傳授文云我將謂你是箇人便歸方丈一本小異

雲峰悅云百丈老人大似憐兒不覺醜雖然如是盡法無民 保寧勇代黃蘗云大眾向後莫辜負老和尚好無著禪師因往五臺禮文殊文殊問近離甚處師云南方殊云南方佛法如何住持師云末法比丘少奉戒律殊云多少眾師云或三百或五百師却問此間佛法如何住持

珠云龍蛇混雜九聖同居師云多少眾殊云前三三後三
三師退乃問童子適來大聖道前三三後三三三三三多少童
子云大德師應諾子云是
多少

汾陽昭代云識得你 翠巖芝云文殊道前三三後三
三作麼生會麼會麼千年無影樹今時沒底靴 徑山
杲云徑山當時若見即向他道和尚如此住持極是不
易

雪竇顯頌云五峰盤屈色如藍誰謂文殊是對談堪笑
清涼多少眾前三三與後三三 正覺逸云前後三三
問若干應機召發轉顛預如今大有如斯者負鉢腰囊
到處搏 佛印元云堪笑前三三與後三三當時相對語喃
喃却因無著分明見從此清涼沒可參 照覺總云聖

者由來不可陪相逢相問豈安排三三前後輝今古一
句無私振九垓 雲溪菘云文殊前後三三三獨泛輕
舟過海南洪浪波心看水勢一輪明月印寒潭 地藏
恩云前三三與後三三三筭數驚皇卒未諳芳草淒淒煙
景裏鷓鴣啼處是江南

投子大同禪師僧問萬法從一法生未審一法又從何生
師云回首看

西禪需云恁麼說話大似按牛頭喫草 松源岳云從
門入者不是家珍撥倒燈籠露柱噴

臨濟玄禪師因定上座問如何是佛法大意師下禪床擒
住打一掌便托開定佇立傍僧云定上座何不禮拜定纔
作禮忽然大悟

雲竇顯頌云斷際全機繼後蹤持來何必在從容巨靈
擡手無多子分破華山千萬重 南華島云一棒一條
痕一搥一掌血若無般若靈根到此如何打發 佛鑑
懃云掣電之機過趙州爲人須到結窮頭掌中擎出香
山子直上高高十二樓 天童覺云不墮前後獨超古
今喚回千歲夢飛出九臯禽直下一棹光迸散斬新彈
子出爐金

雲巖晟禪師自百丈至藥山山問海兄更說甚麼法師云
有時道三句外省取六句外省去山云且喜沒交涉又問
更說甚麼法師云有時上堂衆纔集拈拄杖打下復召大
衆衆回首乃云是甚麼山云何不早住麼道師於言下大
悟

徑山杲云悟去即不無爭柰未出葛藤窠

趙州諗禪師僧問萬法歸一一歸何處師云我在青州作
一領布衫重七斤

圓悟勤云摩醯三眼一句洞明似海朝宗千途合轍雖
然如是更有一著在忽有人問蔣山萬法歸一一歸何
處只向他道饑來喫飯困來眠 佛眼遠云大衆至音
絕韻妙曲非聲通身不掛寸絲赤體全無忌諱諸人切
莫拈鎚舐指直須截斷舌頭放下身心自然快活眼若
不睡諸夢自除心若不異復名何物快活快活歸堂喫
茶

雪竇顯頌云編辟曾換老古錐七斤衫重幾人知而今
拋向西湖裏下載清風付與誰 白雲端云七斤衫重

豈難提日出東方定落西一擊珊瑚枝粉碎轟轟雷雨
滿山溪保寧勇云獨坐獨行真竭斗無規無矩老禪
和四方八面難拘檢天下誰能奈你何文殊道云趙
老布衫重七斤問處分明答處親大地山河都蓋却誰
是當機裁剪刀昔融平云七斤衫重絕纖埃妙手何
人解剪裁堪笑東村王大姐滿身風雨入門來
趙州僧問如何是佛法大意師云猫兒是一伯五十文買
云不問猫兒如何是佛法大意師云這托子是大王送來
云謝師答話師云作家作家僧拂袖便行師云作家師僧
天然猶在

圓悟勤云趙州度量深明神機隱密有權有實有卷有
舒這僧陷在重圍泊驗収身不轉不見道相罵饒你接

甯相唾饒你潑水 塗毒策云水本無聲觸石則響木

元無火因鑽則炎趙州蓋為拔楔抽釘遂有拋鉤擲釣
諸人今日要識趙州麼大路不行荒草走被人喚作販
私商

趙州僧問不指一法如何是和尚法師云老僧不說茅山
法云既不說茅山法如何是和尚法師云向你道不說茅
山法云莫這箇便是也無師云老僧未曾將這箇示人又
僧問法無別法如何是法師云外空內空內外空
趙州僧問方外忽有人問和尚說甚麼法如何祇對師云
鹽貴米賤

西禪需頌云鹽貴米賤諸事成現擬欲商量腦後拔箭
趙州問僧甚麼處來云南方來師云佛法盡在南方汝來

這裏作甚麼云佛法豈有南北耶師云饒汝從雪峰雲居
來只是箇擔板漢

崇壽稠別云和尚是據客置主人

雲居膺禪師僧問如何是一法師云如何是萬法云未審
如何領會師云一法是你本心萬法是你本性且道心與
性是一是二僧作禮師示以頌云一法諸法宗萬法一法
通惟心惟汝性不說異兼同

圓悟勤云又聞雲居弘覺是洞山嫡子將謂全用衲僧
巴鼻元來有時也只拖泥涉水若據將山見處喚甚麼
作心性一二土上加泥又一重

夾山會禪師僧問如何是目前無法師云夜月流輝澄潭
無影僅作掀禪床勢師云上座又作麼生云目前無法了

不可得師云大眾看這一負戰將

洞山虔禪師因洞山問道離甚處師云武陵山云武陵法
道何似此間師云胡地冬抽笋山云別甌炊香飯供養此
人師便出山云此子已後千人萬人把不住

鼓山求云楚麼祇對滴水難消因甚別甌炊香飯
山方云百發百中虔禪師有齧鑊之機驗人底眼目須
是洞山老漢然雖如是三十年後此話大行

白水仁禪師僧問文殊與普賢萬法采同源文殊普賢即
不問如何是同源底法師云却須問取文殊普賢去如何
是文殊普賢師云一釣便上

佛鑑勤於問取文殊普賢處云如蟲禦木又於一釣便
上處云偶爾成文復云大九批判古今褒貶邪正須是

具金剛眼睛始得何故龍蛇易辨衲子難瞞且道適來
句中那箇句是褒那箇句是貶諸人各自歸堂向脚跟
下檢點看 塗毒策云鑽真珠解玉板則易看孔寵下
楔則難月色和雲白松聲帶雨寒這僧坐却含元殿舉
頭更問長安累他本仁老子拖泥帶水還會麼普天皇
道無遮障舞蝶流鶯繞樹枝

北院通禪師問夾山目前無法意在目前不是目前法非
耳目之所到豈不是和尚語山云是師便掀倒繩床叉手
而立夾山起來打一棒師便下去

法眼云是伊掀倒繩床了何不下去須待夾山起來打
一棒了去意在甚麼處

雪峰存禪師僧問萬法歸一一歸何所師荅云牛皮鞞

體

中梁古禪師僧問空劫無人能問法即今有問法何安師
云大悲菩薩爲裏坐

洛浦安禪師僧問如何是佛法大意師云雪覆孤峰峰不
白雨滴石笋笋須生

丹霞淳禪師云海底龍吟雲雨潤林中虎嘯谷風清莫言
滿路生荆棘況是貧家少送迎

雲門偃禪師問僧天下甚麼人會佛法云露柱會佛法師
喝一喝云這死蝦蟆

松源岳云這僧還甘也無入水見長人

雲門僧問如何是一切法皆是佛法師云三家村裏老婆
盈衢溢路會麼云不會師云非但汝不會大有人不會在

又僧問如何是佛法大意師云日裏麒麟看北斗
雲門云若問佛法兩字東西南北七縱八橫朝到西天暮
歸唐土雖然如此向後不得錯舉
雲門在浙中蘊和尚會中喫茶次蘊垂語云見聞覺知是
法法離見聞覺知作麼生時有僧云見定如今目前一切
見見聞覺知是法法亦不可得師遂拍手一下蘊舉頭師
云猶欠一著在蘊云我到這裏却不會
性空禪師見僧來乃問與麼下去還有佛法道理也無云
某甲結舌有分師云老僧又作麼生云素非好手師仰身
合掌僧亦合掌師撫掌三下僧拂袖而出師乃有頌示之
云烏不前兔不後幾人於此忙然走只有闍梨達本源結
舌何曾著空有

佛鑑勸云進不前退不後頭尾中間兩處走胡僧撫掌
笑呵呵此土西天未曾有 大滄智云入林不動草入
水不動波曾經達本源結舌更無過若是參方事須達
末後句 塗毒策云風恬浪靜偏爾魚遊露冷雲深自
然鶴唳這僧既達本源不著空有因甚麼却有許多閑
骨董還知麼不因揚得意爭見馬相如
睦州蹤禪師僧問佛法大意請師提綱師云捻將來與你
提綱云便請和尚道師云拚東籬補西障
長慶稜禪師問靈雲如何是佛法大意雲云驢事未了馬
事到來

汾陽昭頌云靈雲因問出家才驢使前行馬使來長慶
不明真實地句中認影影難開予今報你諸禪侶九衢

杲日照香街 保寧勇云東行不見西行利南頭買賤
北賣貴橫千豎百筭河沙九九翻成八十二 佛鑑勸
云驢事未了馬事來鐘聲未了鼓聲催春來縱步村間
看無限挑花夾李開 無爲子云驢事未了馬事來一
花欲謝一花開安南已得煙塵息塞北將軍唱凱回
玄沙偈禪師問鏡清云我不見一法爲大過患汝道不見
甚麼法清指露柱云莫是不見這箇法麼師云浙中清水
白米從汝喫佛法未夢見在

大瀉詰云若不是鏡清幾乎忘前失後何故不逢別者
終不開拳 雪竇顯云大小鏡清被玄沙熱瞞我當時
若見但向道靈山授記也未到如此 保寧勇代鏡清
拍手呵呵大笑 禾山方云總謂玄沙靈機在掌縱奪

可觀若作如是見解參學眼在甚麼處殊不知鏡清是
箇白拈賊然雖與麼爭柰明眼人難瞞 天童覺云鏡
清當時恁麼答玄沙未後恁麼道還相契也無然則鏡
清又不作佛法夢也須是玄沙同參始得 應庵華云
鏡清放頑佛祖也不柰何若非玄沙深辨來風幾被露
柱吞却有人辨得出妙嚴兩手分付

玄沙一日云深山巖崖千年萬年人跡不到處還有佛法
也無若道有喚甚麼作佛法若道無佛法却有不到處
同安察禪師因座主問三乘十二分教某甲粗知未審和
尚說何法示人師云我說一乘法云如何是一乘法師云
幾般雲色出峰頂一樣泉聲落檻前云某甲不問此事如
何是一乘法師云聞梨英賢老僧蒙昧對眾試道看云某

甲何答師云只見錐頭利不見鑿頭方

圓悟勤云這僧逼同安直得轉身無路及乎同安倒展
旗鎗逼這僧直得無路轉身諸人若未委悉只見錐頭

利若也委悉得去不見鑿頭方

同安問僧近離甚麼處云江西師云江西法道與此間何
別云賴遇問著某甲若問別人即禍生也師云老僧適來
造次云某甲不是嬰兒徒啼黃葉師云傷驚想龜殺活由
我

圓悟勤云宗師家握佛祖鉗鎚理當即行不留朕跡這
僧既上門上戶更說甚麼傷驚如龜斃斧便棒何故重
賞之下必有勇夫 佛燈珣云風吹不入水灑不著大
小同安將錯就錯雖然親到江西未免無繩自縛慧日

打草驚蛇直得當頭一著卓拄杖下座

同安僧問萬法歸真歸何所師云龍門無宿客龜鶴自
成僊云作麼生是龍門無宿客底道理師云柯爛只因基
少局亡羊那得失長途云久嚮和尚師云負笈攻文不勝
交戰

圓悟勤云同安若無後語洎被這僧折倒還委悉麼若
不登樓望焉知滄海寬

同安問僧近離甚處云太原師云太原近日法道如何云
只見雲隨日出水逐波生不知太原法道如何師云你豈
不是離太原云苦苦師云不覩海雲色微鬢草雷聲云以
金湯鑰憎真愛假師便歸方丈僧拂袖便出師云橫抱嬰
兒擬彰皇簡

鼎州文殊禪師僧問萬法歸一一歸何處師云黃河九曲
投子青頌云問法窮因歸何處黃河透過碧波瀾須知
不雲外千峰上別有靈松帶露寒 西禪需云路窮崖斷
進無門賴有山翁指去涼九曲黃河清徹底誰知別是
一乾坤 木庵云九曲那容眨眼看操舟誰解別波瀾
文殊曾展回天手直得朝宗萬派乾

南院顛禪師僧問如何是佛法大意師便喝僧云老和尚
莫探頭好師又喝僧便禮拜師云放過即不可便打又一
僧問如何是佛法大意師便喝僧便禮拜師云今夜兩箇
俱是作家禪客與寶應老稱提臨濟正法眼裁若要一喝
下辨賓主問取二禪客

首山念禪師僧問如何是佛法大意師云楚王城畔汝水

東流其僧於此悟入

佛慧泉頌云楚王城畔水東流逐浪隨波早晚休唯有
謝郎生計在夜深明月上孤舟 三祖宗云楚國城邊

水去東發船便被打頭風蘆花灣裏聽漁唱熨斗煎茶

銚不同 雲溪恭云楚王城畔水東流日夜波濤去不

休巖下忽逢湘水客謂言依舊注悠悠 瀉山秀云楚

王城畔水東流今古朝宗是到頭逐浪隨波如未息輪

他漁父泛孤舟 普融平云千波萬波僧無盡去槩來

帆浩莫窮謝客睡惺孤月白閑吹一笛渡頭風

洞山初禪師僧問萬法歸一一歸何所師豎起兩指僧云

如何得歸一去師云學語之流又僧問如何是佛法大意

師云三日風五日雨

葉縣省禪師僧問萬法歸一歸何處師云北邙山下云
老審意旨如何師云千年中一遇又僧問如何是佛法大
意師云米貴麥賤

承天嵩禪師僧問萬法還從一法生一法從甚處生師云
湘州是箇管陶綿

寶應昭禪師僧問如何是法王法師云長三尺云用者如
何師云鬧市看青天又僧問如何是佛法大意師云燈和
夜月連天照云意旨如何師云火飛嶽面紅塵起

歸宗權禪師僧問學人為佛法來如何是佛法師云正閑
空云便請商量師云周匝有餘

廬山護國禪師僧問萬法歸一未審一歸何處師云陽氣
發來無硬地春晴嬰谷正芬芳

地藏琛禪師因僧從保福來師問彼中佛法如何僧云保
福有時示眾云塞却你眼教你覩不見塞却你耳教你聽
不聞坐却你意教你分別不得師云吾問你不塞你眼見
箇甚麼不塞你耳聞箇甚麼不坐你意作麼生分別

東禪齊云那僧聞了忽然惺去更不他遊上座如今還
得麼若不會每日見箇甚麼

瑞峰端禪師僧問如何是迥絕人煙處佛法師云巔山嶂
峙碧芬芳云恁麼即一真之理華野不殊師云不是這箇
道理又僧問如何是佛法大意師云竹筍一文一雙

興教普禪師僧問盈龍宮溢海藏真詮即不問如何是教
外別傳底法師云眼裏耳裏鼻裏云莫只此便是不師云
是甚麼僧云咄師亦咄

覺華照禪師僧問如來以一音演說法未審和尚以何法
示心師云白雲無定止出沒太虛中云慈麼則善法堂前
獅子吼也師云退後妨他別人問又僧問如何是佛法
意師云松高人恨小路遠馬嫌遙

翠巖真禪師因慈明問如何是佛法大意師云無雲生嶺
上有月落波心明嗔目喝云頭白齒豁猶作這箇見解如
何脫離生死師不敢仰視淚交頤久之遂問如何是佛法
大意明云無雲生嶺上有月落波心師於言下大悟

德山先禪師僧問萬法歸一一歸何處師云五鳳樓前呈
百戲千株松下鳥歌聲又僧問如何是佛法大意師云密
竹長松青山秀色云如何領會師答云龍吟霧起虎嘯風
生

石門徹禪師僧問萬法歸宗宗歸何所師云日裏挑金線
全身轉處空又僧問如何是佛法大意師云三門前松樹
見生見長

慈明圓禪師僧問如何是佛法大意師云洞庭湖水浪滔
天

翠巖真頌云水出高原上風翻浪作銀絲毫聊一頌
裏說書紳水庵一云洞庭湖水若為窮南北東西浩

浩風鸞鳳翱翔非鸞雀野田深處謾尋蹤

北禪賢禪師僧問如何是無心法師云灑稻水車鳴夏夏
云如何是有心法師云機關米人笑未休

松源岳云北禪只解把定不能放行或問靈隱如何是
無心法只向他道種田博飯如何是有心法敲腹謳歌

雲峰悅禪師僧問巖山巖崖還有佛法也無師云有二如
何是巖山巖崖佛法師云樹倒上樹
雲峰僧問萬法歸一一歸何所師云黃河九院云恁麼則
古今無間斷也師云可憐沙塞雁鳴咽與春期
海印信禪師問僧忠國師無情說法南方尊宿如何商量
僧云諸方皆云六根互用師云無眼耳鼻舌身意將甚麼
互用僧擬議師劈脊便棒

開元琦禪師僧問須彌納芥子即不問微塵裏轉大法輪
時如何師云一步進一步云恁麼則朝到西天暮歸唐
師云作客不如歸家云又嚮道風請師相見師云雲月是
同溪山各異

東林頽禪師僧問如何是法師云黃絹幼婦外甥齏曰云

意旨如何師云絕妙好辭

歸宗詮禪師僧問九峰山中還有佛法也無師云有云如
何是九峰山中佛法師云石頭大底大小底小

福昌善禪師僧問如何是不遷底法師云死人不坐禪云
學人不會意旨如何師云那伽常在定又僧問如何是佛

法大意師云東方甲乙木云恁麼則粉骨碎身也師云易
開終始口難保歲寒心

鳳凰山廣禪師僧問如何是和尚此間佛法師云東壁打
西壁

百丈恒禪師僧問承古有言於無異法中而說諸法如何
是無異底法師云鶴脰長鳧脰短云如何體會師云有其
麼可體會

承天確禪師僧問是法平等為甚麼有達不達師云穿靴
登峻嶺騎牛入佛堂
定山素山主僧問如何是不坐不滅法師云春到百花開
秋來羣木落云恁麼則一年一度春也師云欠子細在又
僧問如何是深山巖崖迥絕無人處佛法師云月明千嶂
裏風動萬年枝云恁麼則處處菩提道明明功德林師云
熏天炙地

佛印元禪師僧問如何是諸佛說不到底法師云蟻子解
尋腥處走蒼蠅偏向臭邊飛云學人未曉請師再指師云
九萬里鵬從海出一千年鶴遠天歸

天章楚禪師僧問如何是佛法大意師云一年三百六十
日云便恁麼會時如何師云迢迢十萬不足遠云畢竟如

何師云飯來開口困展脚

玉泉芳禪師僧問從上諸聖以何法示人師拈起拄杖僧
云學人不會師云兩手分付僧擬議師便打又僧問如何
是一乘法師云的當塵毛現

中峰源禪師僧問如何是本來法師云滿目青山云言無
展事進步者何師云禮繁即亂云祇這便是為當別有師
云南嶽石橋

竹園顯禪師僧問萬法歸一一歸何所師云水深不見底
云如何湊泊師云須是本行人

○僧問如何是佛法大意

石頭遷禪師云不得不知云向上更有轉身處也無師云
長空不礙白雲飛 麻谷徹禪師默然僧又問石霜此

意如何霜云主人勲奉帶累關慈拖泥涉水 大梅常

禪師云蒲花柳絮竹針麻線 石霜善禪師云春日鷄

鳴云學人不會師云中秋大吹 黑眼禪師云十年賣

炭漢不知秤畔星 香巖閑禪師云今年霜降早喬麥

總不收 國清奉禪師云釋迦是牛頭獄卒祖師是馬

面阿婆 清化付禪師云華表柱上木鶴飛 天福

禪師云黃河無滴水華嶽總平治 曹山寂禪師云

填溝塞壑 巖頭叟禪師云小魚吞大魚 寶峰黨

禪師云虛空駕鐵船嶽頂浪滔天 報恩岳禪師云昨

夜三更失却火 鼓山晏國師云金烏一點萬里無雲

廣巖澤禪師云幽澗泉清高峰月白 育王通禪師

云直待文殊過即向你道云文殊過也請師道師便打

含珠哲禪師云負女抱子渡恩愛隨流 廣德禪師

云始嗟黃葉落又見柳條青 後招慶禪師云擗擗忽

忽晨鷄暮鐘 雙峰欽禪師云日出方知天下朗無油

那點佛前燈 潭明禪師云百惑謾勞神 青城乘

禪師云興義門前鑿鑿鼓云學人不會師云朝打三千暮

打八百 報恩真禪師云閃爍烏飛急奔騰兔走頻

羅漢禪師云井中紅焰日裏浮漚云如何領會師云遙指

扶桑日那邊 保壽祐禪師云近前來近前來僧近前

師云會麼云不會師云石火電光已經塵劫 魏府大

覺禪師云良馬不窺鞞樹耳知人意 大乘果禪師云

杏種來年麥黍熟當年禾 白兆圓禪師云苦云如何

是道師云普 南院顯禪師云無量大病源云請師醫

師云世醫拱手

石門聰禪師云出你口入你耳云莫

祇這便是也無師云分明聞分明聽

首山念禪師便

喝僧作禮師拈棒僧云和尚此間沒世界那師擲下棒云

明眼人難謾僧云草賊大敗 翠巖真禪師云五通賢

聖云學人不會師云苦至梵天 保寧勇禪師云鑊湯

無冷處 子陵山瑜禪師云好事不如無 廣教志

禪師云你記來多少時云學人不會師云言猶在耳

廣濟通禪師云黑漆崑崙牽白象云和尚莫謾後學好師

云好心不得好報 泐潭澄禪師云文殊自文殊解脫

自解脫 彰法泗禪師云多少人摸索不著云忽然摸

著時如何師云堪作甚麼 雲蓋鵬禪師云舌頭無骨

雲寶顯禪師云祥雲五色云學人不會師云頭上漫漫

大愚芝樵師云推天磕地

法慶言禪師云蜀地出

鑪鐵 西禪光禪師云十字路頭華表柱云學人不會

云師再指師云君自行東我過西 桃園嶼樵師云水

流澗下雲吐峰頭 廣教榮禪師云斗山糶米讓水臺

子 壽寧義禪師云樓上打鼓水上打羅 羅漢宗

禪師云風吹綠竹韻雨滴蘚紋斑 承天昭禪師云魚

行水濁鳥飛毛落 太平端禪師云一人舉令云如何

領會師云四海晏清 海會通禪師云柿桶蓋櫻笠云

學人不曉師云行時頭頂戴坐則掛高閣 雙林已禪

師云人平不語水平不流 萬杉奕禪師云崑崙頭戴

華山尖 武泉政禪師云衣成人水成田 堯遂寬

禪師云點茶須是百沸湯云意旨如何師云喫盡吳留滓

黃巖軒禪師云千日破柴一夜燒
圓通秀禪師云

踏著秤鎚硬似鐵僧無語師云叫賺殺人
資聖禪師云

師云鐵牛生石卵
開元禪師云春寒秋熱云學人

不會師云秋熱春寒
靈峰琦禪師云山深水凍云如

何趣向師云雪冷霜寒
報本元禪師云昨日立春今

日暖百花未綻柳先開云如何是教意師云自家飛絮猶

無定休把長條絆別人
玄沙文禪師云九峰藏夏雪

去乞師方便師云一洞起清風
雲居祐禪師云一客

不煩兩主人云學人未曉師云老僧被汝勘破
三祖

宗禪師云臨河不買水云意旨如何師云特聾作啞

甘露顯禪師云語須搖頭哭須敲石
正覺清禪師云

倉陳米飯淡書齋
等覺云燈籠掛露柱云學

人未會師云佛敎對二門云
有事也無師云大海

若知足百川應倒流
佛窟英道師云一輪纜出海萬

景盡露恩云學人不會師云祇為分明極翻令所得遲

保福殊禪師云清溪三日一回虛云未審其中事若何師

云東頭買貴西頭賣賤云還當也無師云看物酬價

寶林昌禪師云釘椿搖艫云畢竟如何師云把纜放船

淨因覺禪師云有問不當頭箇中無說路云學人不會乞

師再指師云空劫那邊開得口石人也解皺雙眉

○僧問如何是佛法的大意
雲州路

白雲福禪師云直云學人不會此意如何師云崖州路

問知音
濟上座云龍騰滄海魚躍深潭云畢竟如何

體悉師云夜聞祭鬼鼓朝聽
含珠彬禪師云

古木未凋猶鴈叫妙峰明月水晶輝

永安信禮音云

湘源斑竹杖云不會師云枝枝帶淚痕未置廣教空禪師

云棒打石人開鐵眼云即此便是也師去有其交涉

香巖敷禪師云山寒露骨水淺見沙未置虎丘隆禪師云

蛇頭生角

月氏王往罽賓問法現歸

于頔問紫玉佛法現歸

自居易問烏窠佛法現歸

臨濟問黃檗佛法現歸

雲門因僧問佛法現歸

地藏問南方佛法現歸

百丈問南泉不說似人法現歸

林類聚卷第四

